

Месяца маиа в 3-й день
Преподобных Иулиании и Евпраксии Московских
На велицей вечерни

На Господи, возвах: стихиры на 8, глас 5.

Подобен: Радуйся, Живоносный Кресте:

Приидите, благочестивии людие,/ почтим торжество обители
Зачатиевския/ и в песнях возвеличим наставницы премудрыя,/
преподобныя Иулианию и Евпраксию,/ теплыя предстательницы
наша пред Господем,/ и с любовию к ним возопим:/ Христа Бога
усердно молитесь/ низпослати душам нашим мир и велию милость.
Прозябения райская земли Российския,/ сестры по плоти
святителя Алексия,/ преподобныя Иулиание и Евпраксии,/ вы,
издетска уневестившыся Христу Богу,/ основание первыя девичия
обители/ во граде Москве положили есте/ и к Небесному Жениху
многия девы привели есте./ Емуже усердно молитесь/ даровати
нам мир и велию милость.

Ублажим ныне, вернии,/ святую двоицу преподобных матерей,/
инокинь честных наставниц,/ ангельскаго жития ревнительниц,/
престольнаго града заступниц,/ и с любовию к ним возопим:/ о,
предивныя ходатаицы к Богу,/ усердными мольбами вашими/
сподобите нас прияти мир и велию милость.

Радуйтесь, предивныя наставницы,/ Иулиание преблаженная и
Евпраксии прехвальная,/ вы бо трудами неусыпными,/
послушанием и смирением дух мирен стяжали есте./ Темже,
Царствие Небесное улучившыя,/ благочестию и любви научаете/ с
верою к вам притекающих/ и просящих подати мир и велию
милость.

Слава, глас 2:

Днесь прославим, вернии,/ Христа Бога нашего,/ дивнаго во
святых Своих,/ явившаго земли Российстей/ прехвальныя и
богоносныя жены,/ преподобную Иулианию,/ первую игумению
земли Московския,/ и святую Евпраксию, сестру ея
возлюбленную,/ и тако возопим:/ молитвами, Господи, святых
угодниц Твоих/ помилуй и спаси нас.

И ныне, Богородичен: Прейде сень законная:

Вход. Прокимен дне. И чтения 3 преподобническая.

На литии стихира храма.

Слава, глас 8:

Срадуйтесь нам, вся верных множества,/ стольный бо град
Москва/ днесь немолчными гласы воспевае/ светоносную и
преславную память/ преподобных Иулиании и Евпраксии,/ тыя
бо усердно молят Христа Бога нашего,/ даровати нам мир и велию
милость.

И ныне, Богородичен: Безвестная Дево:

На стиховне стихиры, глас 2.

Подобен: Егда от Древа:

Красоты мира суетнаго пренебрегшыя/ и на тесный путь стопы
ваша направившыя,/ преподобныя Иулиание и Евпраксии,/ бдения

и пощения в житии претрудном,/ яко древния подвижницы,
подъяли есте./ Сего ради ныне утешения от Господа/ и непрестан-
наго веселия сподобляетеся,/ мы же вам вопием:/ радуйтесь,
претеплыя предстательницы/ и молитвенницы о душах наших.
Стих: Дивен Бог во святых Своих,/ Бог Израилев.

Присно в страхе Божии пребывающа,/ воздержанием распяте
плоти ваша/ и лестницею добродетелей взыдoste во обители
Горния,/ идеже, со святыми веселящася,/ вознесите, угодницы
Божия, молитвы ко Господу/ о почитающих пресветлую память
вашу и вопиющих:/ радуйтесь, жены преподобныя,/
православным людям заступление.

Стих: Честна пред Господем/ смерть преподобных Его.

Восхвалим, вернии, боголюбивыя жены,/ преподобныя Иулианию
и Евпраксию,/ нищеты Христовы рачительницы,/ смирения
хранительницы,/ благочестия наставницы,/ иноческаго жития
устроительницы,/ сирых утешительницы,/ недужных
целительницы/ и земли Московския молитвенницы.

Слава, глас 6:

Подвигом добрым подвизавшася,/ всеблаженныя Иулиание и
Евпраксии,/ Троицу Пресвятую и Пребожественную/ в житии
вашем прославляли есте,/ Ейже ныне со ангельскими лики
предстояща,/ не оставите зовущих вам:/ радуйтесь, инокинь
наставницы/ и молитвенницы о душах наших.

И ныне, Богородичен: Творец и Избавитель мой, Пречистая:
Тропарь, глас 1:

Христу Жениху уневеститися возжелавшыя/ и подвиги иноческия
Того ради понесшыя,/ добродетельным житием и любовию ко
всем/ себе украсившыя, преподобныя Иулиание и Евпраксии,/ во
граде Москве первыя обители девическия/ устроительницы
явистеся/ и трудов и подвигов брата вашего святителя Алексия/
ревнительницы показастеся./ Сего ради, ныне на Небесех вкупе с
ним торжествующе,/ молитe граду Москве в Православии
утвердятся,/ обители вашей сохранятся/ и спасются душам
нашим.

Ин тропарь, глас тойже:

Христу Жениху уневеститися возжелавшыя,/ преподобныя
Иулиание и Евпраксии,/ во граде Москве обители девическия
устроительницы явистеся/ и брату вашему, святителю Алексию, в
подвизех подражасте./ Сего ради, ныне на Небесех вкупе с ним
торжествующе,/ молитe обители вашей сохранятся,/ граду
Москве в Православии утвердятся/ и спасются душам нашим.

На утрени

На Бог Господь: тропарь тойже, дважды, Слава, и ныне,
Богородичен.

По 1-м стихословии седален, глас 8:

Возложша всю надежду на Бога Вышняго,/ попечения суетная
остависте, преподобныя Иулиание и Евпраксии,/ темже житие

восприяете со безплотными Ангелы и, яко звезды пресветлыя, просветитесь./ Мы же взываем к вам:/ молитесь спаситися душам нашим.

Слава, и ныне, Богородичен:

Буди нам покров и заступление, Премилостивая Владычице Богородице,/ Ты бо еси немощным Стена необоримая/ и безнадежным твердое Упование.

По 2-м стихословии седален, глас 2:

Воспоим, вернии, преподобныя матери наша Иулианию и Евпраксию/ и восхвалим Господа, прославльшаго святых Своих/ и дарующаго нам мир и велию милость.

Слава, и ныне, Богородичен:

Бога из Тебе воплотившагося познахом, Пречистая Дево, едина Благословенная./ Темже, благодаряще, вопием Ти:/ радуйся, Благодатная, Господь с Тобою.

По полиелеи седален, глас 1:

Преподобныя Иулиание и Евпраксии/, подвижницы Христовы, инокинь московских начальницы,/ кротости и целомудрия рачительницы,/ милости просящим подательницы,/ болезней душевных и телесных целительницы,/ молитесь Христа Бога даровати нам мир и велию милость.

Слава, и ныне, Богородичен:

Избранная от рода человеческого Ты еси, Пречистая Богородице,/ Тобою бо к нам сошел есть Христос Бог наш./ Егоже моли спасти души наша.

Степенна, 1-й антифон, 4-го гласа. Прокимен: Дивен Бог во святых Своих,/ Бог Израилев. Стих: В церквах благословите Бога,/ Господа от источник Израилевых. Всякое дыхание: Евангелие от Матфея, зачало 104.

По 50-м псалме стихира, глас 6:

Песни духовныя приносяще,/ днесь умиленно вопием вам,/ угодницы Христовы, Иулиание и Евпраксии,/ первопрестольнаго града похвало/ и обители Зачатиевския украшение,/ молитесь о нас, любовию вас почитающих,/ да Царствия Небеснаго будем наследницы.

Канон, глас 8.

Песнь 1

Ирмос: Колесницегонителя фараона погрузи,/ чудотвори и иногда/ Моисейский жезл, крестообразно поразив/ и разделив море:/ Израиля же беглеца, пешеходца спасе,/ песнь Богови воспевающа.

Сподоби нас, Господи,/ достойно воспети постническая подвиги и преславная чудеса преподобных Иулиании и Евпраксии,/ в них же имя Твое славно прославися.

Возлюбившая от юности всемилостиваго Бога,/ иноческий путь избрали есте, святых,/ и, обеты монашеския даже до конца соблюдя,/ спасение обрели есте.

Ведая всеблагий Господь благое желание сердец ваших,/

благослови обитель девичию во славнем граде Москве устроити,/ идеже ищущии спасения Христа обретаху.
Богородичен: Тебе, Премилостивая Владычице, усердно молимся/ и всю надежду на Тя возлагаем./ Избави от всякия скорби и нужды страну нашу Российскую.

Песнь 3

Ирмос: Утверждаей в начале Небеса разумом/ и землю на водах основавый,/ на камени мя, Христе, заповедей Твоих утверди,/ яко несть свят паче Тебе, Едине Человеколюбче.

Древним преподобным женам подражающа, Иулиание и Евпраксии,/ на земли ангельски пожиле есте,/ темже и ныне с Небесными Силами во обителях райских сликовствуете.

Любовию и чистотою сердечною уневестилися есте Единому Жениху Небесному/ и, верность Ему соблюдша,/ с мудрыми девами в брачный чертог вошли есте.

Яко верныя ученицы,/ предали есте себе, блаженныя, в послушание святителю Алексию,/ брату вашему по плоти,/ с нимже ныне возносите теплыя молитвы за землю Русскую.

Богородичен: Тебе, Пречистая Владычице,/ песнь хвалебную приносим,/ яко Рождшимся от Тебе род человеческий спасеся.

Седален, глас 4:

Днесь людие московстии, собравшеся во обитель Зачатьевскую,/ радости исполняются и со умилением взывают:/ о, преподобныя жены, Иуалиание и Евпраксии,/ сохраните место святое сие и не престаните молиться о нас,/ недостойных чадах ваших,/ честную память вашу празднующих.

Слава, и ныне, Богородичен:

Спаси от бед рабы Твоя, Богородице,/ яко вси по Бозе к Тебе прибегаем,/ яко нерушимей Стене и Предстательству.

Песнь 4

Ирмос: Ты моя Крепость, Господи,/ Ты моя и Сила,/ Ты мой Бог, Ты мое Радование,/ не оставль недра Отча,/ и нашу нищету посетив./ Тем со пророком Аввакумом зову Ти:/ силе Твоей слава, Человеколюбче.

Любве ради ко Христу вся земная ни во чтоже вменивша,/ труды многия во обители понесли есте./ Ныне же, блаженныя, радуется со ангелы в чертозе Царя Небеснаго,/ прославляюще Его неизреченную милость.

Не дали есте сна очима вашим, ни дремания веждама,/ но бодрено в житии Христу послуживша/ и любовь к людем явивша, святыя,/ образ добронравнаго жития иноком показали есте.

Приемшя светильники ваша и елеем добродетелей исполнивша, преподобныя,/ изыдoste в сретение Жениху Христу,/ Иже и введе вас в чертог небесный.

Богородичен: Молим Тя, Дево, Мати Пречистая,/ подаждь нам прощение множества прегрешений/ и исцели души наша.

Песнь 5

Ирмос: Вскую мя отринул еси/ от лица Твоего, Свете

Незаходимый,/ и покрыла мя есть чуждая тьма, окаяннаго;/ но
обрати мя и к свету заповедей Твоих/ пути моя направи, молюся.
Возлюбивша покаяние, воздержание предивное яviste/ и, святым
житием себе украсивша, удалистеся славы земныя./ Сего ради
обретосте славу жизни небесныя и радость неизреченную.
Яко кадило благовонное, быша молитвы ваша, преблаженныя,/ и
имиже и ныне всех, приходящих к вам с верою и любовию,/ на
путь спасения наставляете.

Во дни святительства брата вашего Алексия явились есте
святильницы благочестия,/ дарующя сирым и убогим утешение,/ и
страждущим же и немощным заступление.

Богородичен: Творец всех явися из Тебе, Пречистая Владычице,/ и
милостивно нас возлюбивый/ и от работы вражия избавивый.

Песнь 6

Ирмос: Очисти мя, Спасе,/ многа бо беззакония моя,/ и из
глубины зол возведи, молюся:/ к Тебе бо возопих, и услыши мя,/ и
Боже спасения моего.

Не прельсти вы лукавый соблазнами мира сего и сластями
житейскими,/ но, мужественне его препобедивша, преподобныя,/ и
в терпении стяжали есте души ваша.

Сердца ваша обители Духа Святаго соделаша, святыя,/ темже и
нам помозите сердца очистити от всякия скверны,/ наставницы
премудрыя.

Огнь Божественныя любви имущя в душах ваших, молитвенницы
чудныя,/ светом Христовым просветите души/ верою и любовию
почитающих вас.

Богородичен: Пречистая Богородице Дево,/ укрепи веру
Православную в стране нашей/ и сохрани нас от всякаго зла.

Кондак, глас 2:

Что вас наречем, богомудрыя Иулиание и Евпраксие?/ Немощныя
сосуды естеством,/ но подвиги и труды мужески понесосте;/ и
смиреныя жены,/ но славы отцев воистинну сподобистеся;/ рода
честнаго от земных,/ но умалением себе Небеснаго отечества
достигосте./ Молите усердно Владыку Христа спастися душам
нашим.

Икос:

Христову Церковь украсивша житием вашим, преподобныя
Иулиание и Евпраксие,/ дивныя наставницы в подвизах
иночествующим/ и утешительницы всем притекающим к вам
явились есте./ Сего ради ныне восхваляем вас песньми
духовными, жены богомудрыя,/ и с любовию взываем:/ молите
усердно Владыку Христа спастися душам нашим.

Песнь 7

Ирмос: Божия снизхождения/ огонь устыдеса в Вавилоне иногда,/ и
сего ради отроцы в печи радованною ногою,/ яко во цветнице
ликующе, пояху:/ благословен еси, Боже отец наших.

Общаго жития женскаго на Руси ревнительницы бывша,
премудрыя Иулиание и Евпраксие,/ собрасте многия инокини во

обитель вашу,/ юже не оставите молитвами вашими.
Всем приходящим к вам были есте, яко матери и сестры
любезныя:/ алчущих напитавша, жаждущих напоивша,
странных упокоивша, скорбящих утешивша.
Видя Господь веру вашу и усердие преизрядное, преблаженныя
Иулиание и Евпраксие,/ дарова вам благодать чудеса творити,/ да
прославят люди Бога, дивнаго во святых Своих.
Богородичен: Помилуй нас, Владычице, Мати Бога нашего,
чающих Твоя помощи и заступления,/ Тя бо едину по Бозе
Заступницу имамы.

Песнь 8

Ирмос: Седмерицею пещь/ халдейский мучитель/ богочестивым
неистовно разже,/ силою же лучшею спасены сия видеи,/ Творцу
и Избавителю вопияше:/ отроцы благословите,/ священницы,
воспойте,/ людие, превозносите во вся веки.
Сугубую благодать восприемша,/ боголюбивых жен явились есте
наставницы прехвальныя./ С ними же Христу Богу и Церкви
святей добре послужили есте.
Богобоязненна и благочестива бывши, преподобная Иулиание,/
научала еси ближния твоя благоговению и страху Божию,/ имиже
всяк, хотяй спастися,/ обрящет премудрость и любовь Божию.
Единого Бога взыскующи,/ имела еси собеседники Ангелы Божия,
преподобная мати Евпраксие./ Ныне же с ними воспеваеши славу
Троице Единосущней и Нераздельней.
Богородичен: Превечнаго Бога родила еси, Пресвятая Мати Дево,
Егоже поем и превозносим во вся веки.

Песнь 9

Ирмос: Ужасеся о сем Небо/ и земли удивишася концы,/ яко Бог
явися человеком плотски,/ и чрево Твое бысть пространнейшее
Небес./ Тем Тя, Богородицу,/ Ангелов и человек чиноначалия
величают.
Яко горлицы непорочныя и голубицы чистыя,/ принесли есте
душы ваша в жертву живую Христу, Богу нашему,/ Егоже ныне со
всеми святыми величаете.
Днесь ликовствуют людие и воспевают Господеву песнь
благодарственную:/ слава Тебе, Боже,/ даровавшему
престольному граду Москве святых заступниц.
Радуйся ныне обитель Зачатиевская, града Москвы украшение,/ в
тебе бо прославишася преподобныя жены Иулиания и
Евпраксия,/ благочестием и добронравным житием возсиявша.
Богородичен: Очисти нас от всякия скверны, Пресвятая Мати
Дево,/ и избави муки вечныя,/ Ты бо еси Заступница всесильная
рода христианского.

Светилен:

Пресветлую память вашу празднующе,/ умиленно взываем к вам,
досточудныя Иулиание и Евпраксие:/ молитесь ко Господу,/ да и
мы сподобимся быти причастники света невечерняго.

Слава, и ныне, Богородичен:

Исповедуем Тя, Всенепорочная Дево, Владычицу Богородицу,/ родила бо еси Бога неизреченно,/ даровавшего нам спасение и велию милость.

На хвалитех стихиры, глас 2:

От юности Бога возлюбившая,/ преподобная Иулиание и Евпраксиие,/ иноческаго жития возжелали есте/ и, к подвигом поста и бдения устремившаяся,/ непрестанною молитвою сердца очистили есте,/ темже Бог обогати вы даром исцеления/ и многими чудеса прослави./ Емуже возопиим: Господи, слава Тебе.

Благословением митрополита Алексия,/ святого брата вашего,/ обитель девичию устроили есте,/ преподобная Иулиание и Евпраксиие,/ в нейже благочестно пожившая,/ ко спасению многия привели есте./ Темже, ныне во обителях Небесных пребывающая,/ с радостию взываете: Господи, слава Тебе.

Боголюбивыя жены земли Российскойя,/ преподобная Иулиание и Евпраксиие,/ страну Московскую обителию украсившая/ и образ добронравнаго жития показавшая,/ трудолюбием и нищелюбием Богу угодили есте./ Темже, ныне во обителях Небесных пребывающая,/ с радостию взываете: Господи, слава Тебе.

Слава, глас 8:

Воспоим, вернии, преподобная Иулианию и Евпраксию,/ святая обители Зачатьевския начальницы,/ земли Российскойя усердная молитвенницы/ и первопрестольнаго града Москвы заступницы,/ и возопиим Христу Богу нашему:/ дивный во святых Своих, Боже наш, слава Тебе.

И ныне, Богородичен, глас тойже:

Владычице, прими молитвы раб Твоих /и избави нас/ от всякия нужды и печали.

Славословие великое и отпуст.

На литургии служба преподобническая.

Молитва

О, преподобная Иулиание и Евпраксиие, подвижницы Христовы, инокинь московских наставницы и всех прибегающих к вам скорыя помощницы! Вы от юности Бога возлюбившая, иноческаго жития возжелали есте и благословением митрополита Алексия, святого брата вашего, обитель девичию устроили есте. В нейже, усердно потрудившаяся, молитвою, постом и бдением сердца очистили есте и образ благонравнаго жития показали есте. Темже, яко имеющая дерзновение ко Всемилостивому Спасу, сохраните обитель сию и град Москву от всяких бед и напастей, нашествия иноплеменников и междоусобных брани. Нам же, почитающим вас любовию, даруйте мир и единомыслие, да, вашими молитвами соблюдаемы и сохраняемы, исповедуем Святую Троицу, Отца и Сына и Святого Духа. Аминь.